

IOANE ĜENA TORETORE GINIGUINENA

1 Ioane vaĝa-foforina guruĝari

Ioane na mai fefa giniguinena maiĝa tu dia ekalesia ta ĝena o ekalesia doĝorona ta ĝena etoreato. Asiĝi. Mai tu irau bese ekalesia doĝorori tari, ema Keriso ĝevaĝa-moĝoniato-ĝoi gabu mabarari ai ĝetanuni tarimari ĝeri. Ioane ĝena Vari Namona, e Ioane ĝena fefa toitoi, ema Apokalupo tu ĝia na etorerito. Ioane na mai fefa tu laĝani 85 ma 100 fakari nuĝanai ta etoreato, mo tu Iesu maki emaseto murinaŭ vau.

Mai fefa nuĝanai siri baregori tu karoa 4:16; 5:13.

Ioane na mai fefa etoreato korana tu eurato, 1) ekalesia bene vaĝa-ribari, Barau ĝenana eiaĝomani ribana moĝonina eĝabiani tarimana tu Barau sevisevinai vanaĝivanaĝi etanuni; 2) tarikaka bene vaĝa-naĝiri, ĝia tata ĝeri veĝata Barau ĝesi, e tarikaka tari ĝesi, e tanobara tarimari ema dagarari ĝesi, ema vei-rakava tarimari ĝesi beĝene ĝita-ginikaŭri. Asi beĝene vekako mata-bubu; 3) Keriso ĝevetari-viniani tarimari ĝeri ĝofaĝofa veiĝari bene kiraĝi-foforiri.

Ioane na mai fefa tu maiĝesina eboioĝaiato:

1. Barau tu lamefa mamana kavana emamani - karoa 1-2
2. Barau tu veuravini - karoa 3-4
3. Barau tu maĝuri - karoa 5

Maĝuri guruĝana

1 Tovotovona na veġata etanuto dagarana, ġaseġaġiato, matama na ġaġitaiato, ġenai ġaboġekauto, ema ġiamama na ġaġabi-karaiato: Mai tu Maġuri Guruġana ġavari-fiuani.

2 Mo maġuri efoforito, benamo ġai na ġaġitaiato. Moġa lorinai ġemi ġavari-fiuani ema maġuri vanaġivanagi ġakira-varamini. Mo maġuri tu Tamara ġesi etanuto-ġoi ema ġai ġemai ema foforito.

3 Ġai na ġaġitaiato ema ġaseġaġiato maġurina ġomi ġemi ġakiraġi-foforiani, be ġomi maki ġai ġesi bitana sebona uranai, korana ġai tu Tamara ema ġia Natuna Iesu Keriso ġesi doġoro sebona.

4 Mai guruġa ġatore-vinimini, korana ġita nuġara iaku na beġene vonuvonu-raġe ġana.

Barau tu mama

5 Iesu ġenana ġaseġaġiato varina ġemi ġavari-fiuani tu maiġa: Barau tu mama, mukuna kotuna ta maki ġia ġenai asi etanuni.

6 Bema ġita mukuna maġurinai roġo tarakani nuġanai bita kirani, ġita tu Barau ġesi ta-doġoro-sebonani, ġita tu taġofaġofani ema guruġa moġonina asi takorana-iaġiani.

7 Senaġi bema mama nuġanai bita rakani Barau kavana, ġita tata tu doġoro sebona tarimara, ema ġia Natuna Iesu rarana na ġita ġera rakava mabarari beġuriġi-vaġirini.

8 Bema ġita bita kirani, ġita tu asi ġera vei-rakava, ġita tu tauġera taveġofani, ema ġita ġerai guruġa moġonina tu asiġina.

9 A bema ġita ġera vei-rakava bita kiraġi-foforirini nai, ġia tu ma ġena vetuġamaġikau, ġera

veiġa rakavari mabarari betuġamaġi-fitoġarini, ema ġera veiġa ġeġevaġeġevari beġuriġi-vaġirini.

¹⁰ Bema ġita bita kirani, nega sebna maki asi tavei-rakavato, Barau tu ġofaġofa baraunai bita vaġa-iaġoani, ema ġia ġena guruġa tu ġita nuġarai asi etanuni.

2

Keriso ġita ġera vevaġa-kava tauna

¹ Natugu, mai guruġa atore-vinimini tu ġomi rakava asi boġono vei ġana. Senaġi bema tarima ta bevei-rakavani nai, ġita tu ma ġera vevaġa-kava tarimana Tamara ġesi etanuni, Iesu Keriso, vei-iobukaiobuka tarimana.

² Keriso na ġita ġera rakava voivaġiri ġauveina eveiato, dia ġita ġera rakava moġo, senaġi tarimarima mabarari ġeri rakava.

³ Bema ġita Barau ġena taravatu guruġari bita korana-iaġirini nai, monana bita ribani, ġita tu moġoni Barau taribaiato.

⁴ Bema ta bekirani, “Au tu Barau ribagu,” senaġi ġena taravatu guruġari asi bekorana-iaġirini, mo tarima tu ġofaġofa tarimana, guruġa moġonina ġia nuġanai asi etanuni.

⁵ Senaġi deikara na Barau ġena guruġa ekorana-iaġirini tu, Barau moġoni eura-viniani ma nuġana mabarana ġesi. Monana vau taribani, ġita tu ġia ġesi moġoni sebna.

⁶ Deikara ekirani, ġia tu Barau ġesi doġoro sebna etoni tarimana tu, Iesu Keriso etanuto-ġoi kavana bene tanu.

Taravatu variġuna

7 Ĝatagu mabarami, mai taravatu atore-vinimini tu dia variĝu, senaĝi taravatu guinena, tovotovona na veĝata ĝoĝabiato dagarana. Mai taravatu guinena tu ĝoseĝaĝi-guineato taravatuna.

8 Senaĝi mai taravatu atore-vinimini maki tu variĝu; mo taravatu ĝena moĝoni tu Keriso ĝenai ema ĝomi ĝemi ai maki eforini, korana mukuna tu mai ekorini ema mama moĝonina tu varau emamani.

9 Tarima ta ekirani, ĝia tu mama nuĝanai etanuni, senaĝi tarikakana tu ebaru-viniani, ĝia tu roĝo mukuna nuĝanai etanuni.

10 Tarikakana eura-viniani tarimana tu mama nuĝanai etanuni. Ĝia bevaĝa-vedaĝa-raĝeani dagarana ta ĝenai asi etanuni.

11 Senaĝi tarikakana ebaru-viniani tarimana tu mukuna nuĝanai etanuni e erakani. Ĝia asi ribana aiĝana eiĝoni, korana mukuna na matana evei-bubuani.

12 Natugu, au na atore-vinimini korana tu, ĝomi ĝemi rakava tu Barau na etuĝamaĝi-fitoĝarito Keriso aranai.

13 Tamagu, atore-vinimini korana tu, tovotovona na veĝata etanuto tarimana tu ĝoribaiato.

Maraĝa variĝu, atore-vinimini korana tu, Satani ĝovaĝa-darereato.

14 Natugu, atore-vinimini korana tu, Tamara ĝoribaiato.

Tamagu, atore-vinimini korana tu, tovotovona na veĝata etanuto tarimana tu ĝoribaiato.

Maraĝa variĝu, atore-vinimini, korana ĝomi tu ma gwadami; Barau ĝena guruĝa ĝomi nuĝami ai etanuni, ema ĝomi na Satani ĝovaĝa-darereato.

15 Tanobara asi boĝono ura-vinia, ema tanobara dagarari maki asi boĝono ura-viniri. Bema tarima ta tanobara eura-viniani nai, Barau ĝena veuravini ĝia nuĝanai tu asi etanuni.

16 Korana tu tanobara veiĝari mabarari, tauĝani ĝena ura rakavari, mata-ĝaniĝani, ema veiavi, tu dia Tamara Barau ĝenana ĝeiaĝomani, senaĝi tanobara ĝenana ĝeiaĝomani.

17 Mai tanobara ema tarimarima na ĝemata-ĝaniĝanirini dagarari mabarari tu beĝe korini, senaĝi Barau ĝena ura eveiani tarimana tu betanu-vanaĝi vanaĝini.

Keriso evetari-viniani tarimana

18 Natugu, ĝaro dokona tu maiĝa. Ĝoseĝaĝito ilailanai Keriso evetari-viniani tarimana tu beiaĝomani, maitoma maki Keriso ĝevetari-viniani tarimari vovoka beĝe iaĝoma. Moĝesi nai taribani, mai tu hora magona.

19 Moĝeri tarimarima tu ĝita ĝesi tavegogoto-ĝoi, senaĝi ĝia tu dia ĝita ĝera doĝoro korikori. Moĝa lorinai ĝita ĝeraga-kwanerato. Bema ĝia moĝoni ĝita ĝera doĝoro korikori nai tu, ĝita ĝesi roĝo tara tanu. Senaĝi ĝita ĝerana ĝeveĝitato. Monana evaĝa-foforiani, ĝia mabarari tu dia ĝita ĝera doĝoro.

20 A ĝomi na tu Iauka Veaĝa ĝoĝabiato, Keriso na eborogimito, moĝa lorinai ĝomi mabarami guruĝa moĝonina tu ma ribami.

²¹ Au na atore-vinimini tu dia guruḡa moḡonina asi ribami nai, senaḡi guruḡa moḡonina tu ma ribami dainai, ema ribami maki, ḡofaḡofa tu guruḡa moḡonina ḡenana asi eiaḡomani.

²² Ḡofaḡofa tarimana tu dei? Iesu tu dia Keriso, (Barau na ekiraḡi-toreato vevaḡa-maḡuri tauna), etoni tarimana. Mo tarima tu Keriso evetari-viniani tauna. Ḡia tu Tamara e Natuna ekira-fitoḡarini tarimana.

²³ Natuna ekira-fitoḡaiani tarimana tu Tamana maki ḡia ḡenai tu asiḡina. A deikara na Natuna eḡabi-raḡeani tarimana tu, Tamana maki eḡabi-raḡeani, ema Tamana maki ḡia ḡenai etanuni.

²⁴ Tovotovona na veḡata ḡoseḡaḡiato guruḡana nuḡami ai bene tanu. Bema nuḡami ai betanuni tu, ḡomi maki Natuna e Tamana nuḡari ai boḡo tanuni.

²⁵ Ema mai maḡuri vanaḡivanaḡi tu Keriso tauḡena na ḡita ḡera ekiraḡi-toreato dagarana.

²⁶ Maiḡeri guruḡa ḡomi atore-vinimini tu, ḡomi ḡeḡofa-veḡitami ḡetoni tarimari akiraḡi-foforirini.

²⁷ Senaḡi ḡomi na Iauka Veaḡa ḡoḡabiato Keriso ḡenana tu nuḡami ai etanuni. Moḡa lorinai inito-oma vevaḡa-riba tarimana ta ḡomi bene vaḡa-ribami ḡana tu asi boḡo ura-viniani. Korana mo Iauka Veaḡa na dagara mabarari evaḡa-ribamini, ema ḡena guruḡa tu moḡoni, dia ḡofaḡofa. Moḡa lorinai evaḡa-ribamito ilailanai, Keriso nuḡanai boḡono tanu.

²⁸ Natugu, Keriso nuḡanai boḡono tanu. Be ḡia befoforini ḡaronai tu nuḡara ma kokoreri ema asi beḡene maiakara ḡia ḡoiranai ḡena ḡenoḡoi ai.

²⁹ Bema ġomi ma ribami Keriso ġena veiġa tu iobukaiobuka nai, boġo ribani, ġevei-iobuka iobukani tarimari mabarari tu Barau ġenana ġemaġurito.

3

Barau natuna

¹ Ġoġitaia, Tamara ġena veuravini tu asikeikeina ġita iatarai etoreato. Moġesi naima ġita ekiraġirani Barau natuna. Moġoni, ġita tu ġia natuna. Moġa lorinai tanobara na maki asi eribarani, korana Barau maki asi ġeribaiato.

² Ġatagu mabarami, maitoma ġita tu Barau natuna. Ġita kara ai bita iaġoni tu roġosi bene fori. Senaġi ġita ribara, Keriso befororini ġaronai, ġita tu ġia ilailanai bita iaġoni, korana ġia tu vetoġana korikorinai bita ġitaiani.

³ Tarimarima mabarari mai tuġamaġikau ġeġabiani tu, tauġeri ġevevaġa-iarevani, korana Keriso tu asi mirona e asi vetoukauna ta.

⁴ Rakava ġeveini tarimari mabarari tu Barau ġena taravatu ġekira-fitoġaiani, korana veirakava tu taravatu ġekira-fitoġaiani dagarana.

⁵ Senaġi ġomi tu ma ribami, Keriso efororito korana tu, ġita ġera rakava bene ġabi-veġitari ġana. Ġia ġenai rakava ta tu asiġi.

⁶ Keriso nuġanai etanuni tarimana tu asi eveirakava rovaġi-rovaġini. Rakava eveini tarimana na Keriso tu asi eġitaiato ema asi eribaiato maki.

7 Natugu, ta na asi bene ġofami. Veiġa iobukaiobukari eveini tarimana tu vei-iobukaiobuka tarimana, vaġa-ilailana Keriso kavana vei-iobukaiobuka tarimana.

8 A vei-rakava eveini tarimana tu Diabolo ġena tarima, korana Diabolo tu tovotovona na veġata roġo evei-rakava-iaġomani. Barau Natuna efoforito korana tu, Diabolo ġena ġauvei benema vaġa-rakavaia ġana.

9 Barau ġenana emaġurito tarimana tu asi bevei-rakava rovaġi-rovaġini, korana Barau ġena maġuri tu ġia ġenai etanuni. Ġia tu vei-rakava asi ma bevei-ġenoġoini, korana Barau tu ġia Tamana.

10 Barau natuna ema Diabolo natuna vetoġari ġeri irau tu maiġesi beġe foforini: Veiġa iobukaiobukari asi eveini tarimana ema tarikakana asi eura-vinirini tarimana tu dia Barau natuna.

Boġono veura-vevini

11 Tovotovona na veġata ġoseġaġiato guruġana tu maiġesi: Ġita tata bitana veura-vevini.

12 Ġita tu Kaino eveito kavana tu asi bitana vei. Ġia tu Satani ġena tarima. Tarina korikorina Abela evaġi-maseato. Karase nai Kaino na evaġiato? Korana ġia ġena veiġa tu rakava, a tarina ġena veiġa tu iobuka.

13 Tarikakagu mabarami, bema tanobara maġurinai ġetanuni tarimari na beiaurakavamini nai, nuġami asi beġene farevaġi.

14 Ġita ribara, ġita tu mase ġenana maġuri ġenai tavanaġito. Vetoġana tu tarikakara tauravvinirini. Tarikakana asi eura-viniani tarimana tu roġo mase nuġanai etanuni.

15 Deikara tarikakana eiau-rakava-viniani tarimana tu vevaḡideba tarimana. Gomi ribami, vevaḡideba tarimana nuḡanai tu maḡuri vanaḡivanaḡi asi etanuni.

16 Keriso na ḡena maḡuri etore-tariato, ḡita bitana maḡuri ḡana. Monai veuravini anina bita ribaiani. Moḡa lorinai ḡita na maki tarikakara dairi ai ḡera maḡuri bitana tore-tariri neḡi namo.

17 Bema tarima ta ma ḡena farefare vovoka, benamo tarikakana ta beḡitaiani ḡena rabu ai, senaḡi asi ma bevetuḡa-ḡwaiiani e asi bevaḡa-kavaiani, kamara dabarai Barau ḡena veuravini ḡia nuḡanai betanuni?

18 Natugu, ḡera veuravini tu dia guruḡa koriri ai moḡo bitana kiraḡiri, senaḡi veigai ema moḡoni ai bitana vaḡa-foforia.

19 Monana vau bita ribani, ḡita tu Barau ḡena guruḡa moḡonina na beḡori-kaurani, ema Barau ḡoiranai nuḡara beḡe kokoreni.

20 Bema ḡita nuḡara beḡe kirani, ḡita tu kerere, bitana riba, Barau tu barego, a ḡita nuḡara tu kei, ema Barau tu dagara mabarari ma ribana.

21 Ḡatagu mabarami, bema ḡita nuḡara na asi beḡe kiraḡi-kerererani nai tu, ḡita nuḡara tu ma gwadara ḡesi Barau ḡoiranai bita ruḡa-tarini.

22 Ema bita noḡiani dagarari mabarari Barau na bevinirani, korana ḡena taravatu guruḡari takorana-iaḡirini ema Barau vaḡa-iakuna veigari taveirini nai.

23 Ḡia ḡena taravatu guruḡana tu maiḡa: Ḡia Natuna Iesu Keriso arana bitana vaḡa-moḡonia, ema ḡita tata bitana veura-vevini, Keriso na taravatu guruḡana evinirato ilailanai.

24 Barau ġena taravatu guruġari ekorana-iaġirini tarimana tu Barau nuġanai etanuni, ema Barau maki ġia nuġanai etanuni. Barau na Iauka Veaġa evinirato, monana ġita taribani, ġia tu ġita nuġarai etanuni.

4

Iauka moġonina ema ġofaġofa iaukana

¹ Ġatagu mabarami, iauka mabarari asi boġono vaġa-moġoniri, senaġi iauka boġono ribari ġana boġono tovonagi-guineri. Ġia tu Barau ġenana ġeiaġomato ba? Korana peroveta tarimari ġofaġofari ġutuma tanobarai ġerakao-rakaoni.

² Barau Iaukana tu mai vetoġai boġo ribaiani: Iauka mabarari beġe kirani, “Iesu Keriso tu tarimarimai eiaġoto,” ġia tu moġoni Barau ġenana.

³ Ma iauka mabarari asi beġe kirani, Iesu Keriso tu tarimarimai eiaġoto, tu dia Barau ġenana. Ġia tu Iesu evetari-viniani iaukana. Ġoseġaġito, ġia tu beiaġomani, ema ġia tu varau maiġa tanobarai.

⁴ Natugu, ġomi tu Barau ġenana, ema ġomi na peroveta tarimari ġofaġofari ġovaġa-darererito, korana ġomi nuġami ai etanuni Iaukana seġukana na tanobara iaukari ġeri seġuka evanaġirini.

⁵ Mo peroveta tarimari ġofaġofari tu tanobara ġena, moġesi naima ġeri guruġa tu tanobara ġena dabarai ġeguruġani, ema tanobara na maki ġia ġeseġaġi-vinirini.

⁶ Senaġi ġita tu Barau ġena. Be Barau ġena tarimarima na tu beġe seġaġi-vinirani, a Barau asi

ġekorana-iaġiani tarimari na tu asi beġe seġaġi-
vinirani. Iauka moġonina e ġofaġofa iaukana tu
mo vetoġai bita ġita-learini.

Barau tu veuravini

⁷ Ġataġu mabarami, ġita tata bitana veura-
vevini, korana veuravini tu Barau ġenana
eiaġomani. Eveura-vinini tarimana tu Barau
ġenana emaġurito, ema ġia ma ribana Barau.

⁸ Asi ġena veuravini tarimana tu Barau asi
ribana, korana Barau tu veuravini.

⁹ Barau ġena veuravini ġita ġerai tu maġesi
evaġa-foforiato: Barau na Natuna ġora-ġereġa
tanobara ġana etuġuato, ġia bakunai ġita bitana
maġuri ġana.

¹⁰ Veuravini anina tu maġa: Dia ġita na Barau
taura-viniato, senaġi ġia na ġita eura-vinirato,
benamo Natuna etuġuato, ġena mase ġenana ġita
ġera rakava benema voi-vaġiri ġana.

¹¹ Ġataġu mabarami, Barau na ġita tu moġesina
eura-vinirato nai, ġita maki tata bitana veura-
vevini.

¹² Tarima ta na Barau asi eġitaiato. Senaġi
bema ġita tata taveura-vevinini nai tu, Barau
tu ġita nuġarai etanuni ema ġena veuravini tu
ebaregoni ġita nuġarai.

¹³ Ġita ma ribara ġita tu Barau nuġanai tata-
nuni, ema Barau maki ġita nuġarai etanuni, ko-
rana ġia Iaukana ġita evinirato.

¹⁴ Ġai na ġaġitaiato, ema tari maki ġakira-
vararito, Tamara na tu Natuna etuġuato tanobara
ġena vevaġa-maġuri tarimanai bene iaġo ġana.

¹⁵ Bema tarima ta bekirani, “Iesu tu Barau Natuna,” ġia nuġanai tu Barau ema ġia maki Barau nuġanai etanuni.

¹⁶ Ema ġita maki ribara e tavaġa-moġoniani, Barau na ġita eura-vinirani.

Barau tu veuravini, ema veuravini ai etanuni tarimana tu Barau nuġanai etanuni, ema Barau maki ġia nuġanai etanuni.

¹⁷ Moġesi bita tanuni vau, Barau ġena veuravini bebaregoni ġita ġerai, benamo Kota baregona ġaronai ġita tu ma kokorera ġesi bita foforini. Korana ġita ġera maġuri mai tanobarai tu Keriso ġena maġuri ġesi ilaila.

¹⁸ Veuravini ai gari tu asi etanuni. Veuravini korikorina na gari elai-fitoġaiani. Gari ai etanuni tarimana tu vei-rakava voina garina eveini. Bema tarima ta egarini, ġia tu veuravini korikori ai roġosi bene barego.

¹⁹ Ġita taveura-vinini, korana Barau na ġita euravini-guinerato.

²⁰ Bema tarima ta ekirani, “Au na Barau aura-viniani,” senaġi tarikakana tu ebaru-viniani, ġia tu ġofaġofa tarimana. Korana bema ġia tarikakana eġitaiani, senaġi asi eura-viniani, kamara dabarai asi eġitaiani Barauna beura-viniani.

²¹ Keriso na mai taravatu guruġana evinirato: Barau eura-viniani tarimana na tu tari-kakana maki bene ura-vinia.

5

Ġera kokore tanobara iatanai

¹ Deikara na evaḡa-moḡoniani Iesu tu moḡoni Keriso, (Barau na ekiraḡi-toreato vevaḡa-maḡuri tauna), ḡia tu Barau ḡenana emaḡurito. Ema Tamana eura-viniani tarimana na tu natuna maki eura-viniani.

² Barau taura-viniani ema ḡena taravatu guruḡari takorana-iaḡirini nai tu, moḡeri na ḡita bita ribani, Barau natuna taura-vinirini.

³ Barau taura-viniani nai tu ḡena taravatu guruḡari takorana-iaḡirini. Ġia ḡena taravatu guruḡari korana-iaḡiri tu asi gwaḡiḡi.

⁴ Korana tu Barau natuna mabarari na tanobara ḡevaḡa-darereani. Ġita tu ḡera veḡabidadama na tanobara tavaḡa-darereani.

⁵ Deikara na tanobara evaḡa-darereani? Iesu evaḡa-moḡoniani ḡia tu Barau Natuna etoni tarimana moḡo.

Barau na ḡia Natuna Iesu Keriso ekiraḡi-foforiani

⁶ Iesu Keriso tu eiaḡomato nanu na ebabati-soato, ema rarana eriḡoto satauro ai. Ġia tu dia nanu ḡereḡana na moḡo eiaḡomato, senaḡi nanu e rara ḡerina. Iauka Veaḡa na evaḡa-foforiani mai tu moḡoni, korana Iauka tu moḡoni.

⁷ Dagara tu toitoi na ḡevaḡa-foforiani:

⁸ Iauka, nanu, ema rara. Ġia toitoi ḡeri guruḡa-fofori tu sebona.

⁹ Tarimarima ḡeri vevaḡa-moḡoni guruḡari tu taḡabi-raḡerini, senaḡi Barau ḡena vevarifiu tu barego lelevaḡi, korana moḡa tu Barau ḡena vevaḡa-moḡoni, Natuna evaḡa-moḡoniani guruḡana.

¹⁰ Mo vevaḡa-moḡoni guruḡana tu Barau Natuna ḡevaḡa-moḡoniani tarimari nuḡari ai

ġetanuni. A Barau asi ġevaġa-moġoniani tarimari na Barau tu ġofaġofa baraunai ġevaġa-iaġoani, korana Barau na Natuna evari-fiuato guruġana asi ġevaġa-moġoniani.

¹¹ Guruġa moġonina tu maiġa: Barau na maġuri vanaġivanaġi varau evinirato, ema mo maġuri vanaġivanaġi tu ġia Natuna nuġanai.

¹² Barau Natuna eġabi-raġeato tarimana na maġuri eġabiato. A Barau Natuna asi eġabi-raġeato tarimana na maġuri asi eġabiato.

Maġuri vanaġivanaġi

¹³ Maiġeri guruġa tu ġomi, Barau Natuna arana ġovaġa-moġoniani tarimami, atore-vinimini, korana tu boġono riba, ġomi tu varau maġuri vanaġivanaġi ġoġabiato.

¹⁴ Ġita nuġara tu maiġesi vau ma kokoreri ġesi Barau ġoiranai bita ruġani, mai tu bema dagara ta ġia ġena ura ilailanai bita noġiani nai tu beseġagirani.

¹⁵ Ġita ribara, ġia na ġera noġinoġi mabarari eseġagirini. Ema ġita maki ribara, bita noġini dagarari tu bita ġabini ġia ġenana.

¹⁶ Bema tarima ta tarikakana eġitaiani vei-rakava eveiani, senaġi mo rakava na asi bevaġa-maseani, tu bene ġauġau ġia ġena, be Barau na maġuri bene vinya. Moġa tu evei-rakavani, senaġi mo vei-rakava na asi bevaġa-maseani tarimana akiraġiani. Vei-rakavana ta tu mase evaġa-ġoraiani. Moġa tu asi bene ġauġau-iaġia atoni.

¹⁷ Veiġa ġeġeva-ġeġeva mabarari tu vei-rakava, senaġi vei-rakava tari tu mase asi ġevaġa-ġorarani.

18 Ĝita ribara, Barau ĝenana ĝemaĝurito tari-mari tu asi ĝevei-rakava rovaĝi-rovaĝini, korana Barau Natuna na enariĝau-ĝitakaurini, ema Diabolo na asi eĝabi-kararini.

19 Ĝita ribara, ĝita tu Barau natuna, ema tano-bara mabarana tu Diabolo na eĝori-kauani.

20 Ĝita ma ribara maki, Barau Natuna tu eiaĝomato, ĝia na tuĝamaĝi-faka evinirato, Barau moĝoni bitana ribaia ĝana. Ĝita tu Barau moĝonina nuĝanai tatanuni, korana ĝia Natuna Iesu Keriso nuĝanai tatanuni. Iesu Keriso tu Barau moĝonina ema ĝia tu maĝuri vanaĝivanaĝi.

21 Natugu, barau ĝofaĝofari ĝerina boĝono veĝita.

GINITAŌ VARIŪUNA
The New Testament in the Sinaugoro Language of
Papua New Guinea
Nupela Testamen long tokples Sinaugoro long Niugini
Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 18 Apr 2025 from source files dated 31 Aug 2023
a998e4ce-f2f7-5577-968e-5d2feef358f1